

# Radøy kommune

## Saksframlegg

| Saknr    | Utval                 | Type | Dato       |
|----------|-----------------------|------|------------|
| 017/2018 | Formannskapet i Radøy | PS   | 15.03.2018 |
| 010/2018 | Kommunestyret i Radøy | PS   | 12.04.2018 |

|                      |                     |                     |
|----------------------|---------------------|---------------------|
| <b>Sakshandsamar</b> | <b>Arkivsaknr.:</b> | <b>Dokumentnr.:</b> |
| Lisbeth Toppe Alvær  | 15/1043             | 18/3596             |

## Organisering av Frivilligsentralen

### Saksopplysingar:

#### Bakgrunn

Målgruppa for Frivilligsentralen i Radøy er primært den eldre delen av befolkninga. Frivillige, som i stor grad er i aldersgruppa 70+, står for middagskøyring til heimebuande, bidreg med besøkstenester, hjelp til handling og ulike sosiale tiltak både på Velferdssenteret, Frivilligsentralen og på andre arenaer. Dei frivillige oppdraga vert sett stor pris på i Radøy-samfunnet. Frivilligsentralen i Radøy er organisert med eige styre og med årsmøte som øvste organ, og har eigne retningslinjer for sitt arbeid.

I 2017 har det kome politiske signal om at målgruppa for frivilligsentralen sitt arbeid med fordel kan utvidast. Dette kjem m.a. til uttrykk i verbalpunkt til budsjettet: *«(...) ein god dialog med Frivilligsentralen om korleis rekruttera frivillige til arbeid for flyktningar og menneske med særskilde behov.»*

Frå 1. januar 2017 er ansvar for frivilligsentralane overført frå staten til kommunane. Det inneber mellom anna at midlar til frivilligsentralane vert tildelt gjennom rammetilskot og ikkje som øyremerka tilskot, slik som tidlegare. Kommunestyret gjorde følgjande vedtak i sak 047/17: *«Med bakgrunn i at ansvaret for tildeling av midlar til frivilligsentralane er overført til kommunane frå 1.1.2017, ber kommunestyret om at rådmannen legg fram sak om ny organisering, inkl. retningslinjer for Frivilligsentralen i Radøy, til kommunestyremøtet i desember 2017.»*

På denne bakgrunn har rådmannen vore i dialog med dagleg leiar og styreleiar vedkomande gjeldande retningslinjer for Frivilligsentralen, framtidig organisering og tilhøyrande prosess. Som eit ledd i denne prosessen var problemstillinga sak på styremøte i Frivilligsentralen 19.02.18, der ordførar og varaordførar også var invitert.

I referat frå styremøte i Frivilligsentralen 19.02.18, pkt 5 heiter det: *«Det har vore eit ynskje frå politisk hald at retningslinjene må endrast. Ordføraren var usikker på om det var rette tidspunkt å gjera dette no. Det kan verta store endringar når det vert Alver kommune. Ordførar vil ta dette opp med rådmann og kommunalsjef.»*

#### Vurdering

Rådmannen vurderer Frivilligsentralen som ein viktig institusjon som med fordel kan påta seg andre viktige oppgåver, dersom tilhøva ligg til rette for det. Samfunnet er i stadig utvikling, og rådmannen er samd i at det kan vere føremålstenleg å vurdere både organisering, retningslinjer og målgrupper for Frivilligsentralen sitt arbeid. Retningslinjene er gamle, og bør reviderast. Som for øvrige tenester i kommunen sin regi er det behov for å tilpasse seg samfunnsendringar og nye behov.

Utfordringa er at det er kort tid til etablering av Alver kommune. Rådmannen meiner at spørsmål om organisering bør avvente initiativ frå Alver kommune, slik at ein unngår dobbeltarbeid og at utviklinga skjer i samspel med dei øvrige frivilligsentralane under leiing av Alver kommune. Dagleg leiar har vore i dialog med leiarane i dei øvrige frivilligsentralane, og det er også her semje om at endrings- og utviklingsarbeid bør skje i regi av Alver kommune.

Dette utelukkar ikkje at ein kan oppmode Frivilligsentralen om å kartlegge behov for frivillige tenester/ønske om å bidra som frivillig, etablere uformelt samarbeid med andre aktørar, og inkludere nye målgrupper i sitt frivillige arbeid.

### **Konklusjon**

Rådmannen meiner at endring av organisasjons- og styringsstruktur bør avvente eit initiativ frå Alver kommune, og skje i samspel med dei øvrige Frivilligsentralane.

### **Rådmannen sitt framlegg til vedtak:**

Arbeid med å endre organisasjons- og styringsstruktur for Frivilligsentralen i Radøy vert utsett og sett i samanheng med øvrige prosjekt i Alver kommune.

### **Formannskapet i Radøy - 017/2018**

#### **FS - handsaming:**

Ordførar og varaordførar har vore i møte med styret i Frivilligsentralen, der organisering av sentralen vart drøfta.

Formannskapet meiner det er natuleg at endringar i organisasjons- og styringsstrukturen for Frivilligsentralen i Radøy vert sett i samanheng med øvrige prosjekt i Alver kommune.

Kirsti Gjetle Floen (AP) meiner det er viktig at Frivilligsentralen engasjerer seg i arbeidet med å integrera flyktningar.

#### **Ho sette fram følgjande tilleggsframlegg:**

Formannskapet oppmodar Frivilligsentralen om å kartlegga behov for frivillige tenester/ønske om å bidra som frivillig, etablere uformelt samarbeid med andre aktørar, og inkludere nye målgrupper i sitt frivillige arbeid.

Formannskapet vedtok rådmannen sitt framlegg til vedtak, med tilleggsframlegg sett fram i møtet.

#### **FS - vedtak:**

Arbeid med å endra organisasjons- og styringsstruktur for Frivilligsentralen i Radøy vert utsett og sett i samanheng med øvrige prosjekt i Alver kommune.

Formannskapet oppmodar Frivilligsentralen om å kartlegga behov for frivillige tenester/ønske om å bidra som frivillig, etablere uformelt samarbeid med andre aktørar, og inkludere nye målgrupper i sitt frivillige arbeid.

## **Kommunestyret i Radøy - 010/2018**

### **KS - handsaming:**

Leif Taule (SP) sa at Frivilligsentralen har gjort - og gjer eit stort arbeid, særleg for dei eldre. Taule meiner likevel at sentralen må jobba for å nå nye målgrupper. Han viste til at fleirtals-koalisjonen etter valet har bede rådmannen følgja opp dette overfor Frivilligsentralen. Taule meiner det er viktig for politikarane og administrasjonen å koma i tettare dialog med Frivilligsentralen for nettopp å jobba mot ny målgrupper og rekruttera nye frivillige.

### **På vegne av SP/AP sette Taule fram følgjande tilleggsframlegg:**

I retningslinene for Frivilligsentralen vert det sett inn at formannskapet vert årsmøte i sentralen.

David Pletten Aasgard (KRF) kunne ønskt at fellesnemnda for Alver kommune setja igang arbeidet med å laga nye retningslinjer og arbeidsoppgåver for frivilligsentralane.

Kenneth Taule Murberg (H) meiner at det vil vera betre å styrka politisk representasjon i styret i Frivilligsentralen, dersom intensjonen er betre politisk styring med sentralen.

I dag står det ikkje noko i retningslinene om kven som er årsmøte i Frivilligsentralen. Ordførar Jon Askeland meiner det kan vera krevjande å gjera store endringar i sentralen berre halvanna år før Alver kommune er i drift. Ordføraren peika på at årsmøtet i sentralen kan gje signal og forventningar. Kommunestyret vedtok samrøystes formannskapet si tilråding, med tilleggsframlegget frå SP/AP sett fram i møtet.

### **KS - vedtak:**

Arbeid med å endra organisasjons- og styringsstruktur for Frivilligsentralen i Radøy vert utsett og sett i samanheng med øvrige prosjekt i Alver kommune.

Formannskapet oppmodar Frivilligsentralen om å kartlegga behov for frivillige tenester/ønske om å bidra som frivillig, etablera uformelt samarbeid med andre aktørar, og inkludera nye målgrupper i sitt frivillige arbeid.

I retningslinene for Frivilligsentralen vert det sett inn at formannskapet vert årsmøte i sentralen.

### **Vedlegg:**

Frivilligsentralen

Retningslinjer frivilligsentralen

Referat st møte 19 02 2018